

Kapitulo 24

Éksito di nos bida

E éksito di nos bida ta Dios. Pa e motibu aki, Dios i Dios Su asuntunan mester ta na promé lugá den nos bida. Pues no pone nada ni ningun hende dilanti Dios. Dios mesté ta promé ku tata, mama, ruman i bo mes yunan i bo mes persona, i den tur sirkunstansia ku por presentá.

Ora kosnan importante i urgente presentá, na momentu ku nos mester prediká o nos ta e persona indispensable pa e servisio di Señor, nos por bisa ku semper esaki ta bini pa proba si Dios ta na promé lugá den nos bida, i si ta asina, e persona ku tin Dios promé, no ta pensa i puntra kiko mi mester hasi, e ta aktua mesora i demostrá ku Dios ta promé den su bida. Mi tin hopi eksperensha di e pruebanan aki. Mi a trata pa pone Dios na promé lugá den mi bida i pa semper.

A sosodé dos kaso di importansha i di urgensha net na e momentu ku mi tabatin servisio di Señor. Mi tabata kla pa sali, i hospital ta yama, bisa ku mi mama a bira mas malu pa e yunan bini lihé, i mi a bisa mi kasá yama mi rumannan i bisa nan ku hospital a yama, ami mester ta na servisio di Señor, i Señor mes lo ta serka mi mama. Ora ku mi kaba lo mi bai mira kiko a pasa ku mama. Pa nueb'or i mei mi a yega hospital, mama tabata so. Mi a puntra e enfermera, "Mi rumannan no a bini aki?" E la bisa mi, "Si, pero och'or mama su kondishon a normalisá atrobe, i mi a bisa nan, ku nan por bai numa." Och'or mi a kuminsá estudio i sinku persona a disidi pa sigui Señor i despues di un luna mama, e sirbidora di Señor, a bai sosegá. I meskos a sosodé dia di mi tata. Mi a bai prediká pa bautismo di un grupo di hende i despues mi a bai hospital i mi a haña tata sintá riba kama ta papia i hari, despues di kasi dos aña tata a bai sosegá den Señor.

Pero mi mester bisa ku si bo ta bai pa servisio di Señor i bo yu a kai kibra su brasa òf pia bo no por bai laga e yu. Siguramente Dios ta manda un solushon pa e kaso aki. Lo presentá un persona ku bo por enkargá ku e yu i despues di servisio di Señor bo ta bai serka bo yu i lo bo mira ku tur kos a bai bon, pasombra bo tabata na servisio di Señor, i Señor tabata serka bo yu.

Hesus ta mustra importansha di pone Dios na promé lugá

E hòMBER a bisa Hesus, "Señor, laga mi bai promé i dera mi tata. Ma Hesus a bis'é: Laga e mortonan dera nan morto; ma abo, bai i anunsiá e reino di Dios." Lukas 9:59,60 Apòstel Pablo ta bisa ku nada por separá nos di e amor di Dios ku ta den Hesus. (Romanonan 8:35-39)

Kon teribel piká ta i su konsekuensha ta doloroso. Piká di Adam a trese tur sufrimentu i morto, piká di un ratu ta hasi daño pa semper. Adam a pèrdè reino i bida eterno i su identidat komo yu di Dios. Plaser di un ratu a kousa Ruben pa pèrdè primogenitura pa semper i e primogenitura a bai te na Hosé i su yunan.

Dikon na Hosé? Pasobra Hosé a haña e mes tentashon ku Ruben; Ruben a profaná kama di su tata. E señora di Hosé su hefe tabata buska pa Hósé hasi e meskos, pa drumi ku n'e riba e kama di e hefe, pero Hosé no kier a peka kontra Dios i pèrdè e kontakto i e eksperensha ku e tabatin ku Dios. Pues kaminda Ruben a kai, Hosé a para, esaki ta e rason ku e primogenitura a pasa pa Hosé, (1 Krónikanan 5:1,2) Hosé semper tabatin Dios na promé lugá i e la mantené te na fin di su bida. Ta bon ku nos sigui su ehémpel.

Esun ku no laga Dios na kaya, Dios nunca ta lag'é na kaya. Dios a primintí di libra nos di tur malu i Dios ta fiel na Su promesanan, ta nos mester spera riba Dios pa trese liberashon. Tin poder den Dios pa hende por biba sin peka. Juan a skirbi ku Dios ta duna nos poder pa bira yunan di Dios. (Juan 1:12,13 i Yuna 3:8-10) E apòstel ta separá yunan di Dios i yunan di diabel. Yunan di diabel ta peka, e yunan di Dios no ta peka pasombra e simia di Dios ta den nan. Amén.

Dios na promé lugá mester ta di prinsipio, for di ora ku e hende a tende e evangelio i disidi di aseptá Hesus komo su Salvador, e mester pone Dios na promé lugá den su bida pa e por tin viktoría riba tur hende i sirkunstanshanan ku ta bini pa stroba e persona di aseptá Hesus. Pues pone Dios na promé lugá i mantené e bon konsepto di Señor, manera Josué i Kaléb, (Josué 14:6-15) Ku bon Dios bendishoná i duna nos e Spiritu Santu pa semper. E éksito di bida ta Dios promé den tur kos. David a bisa, "Mi tabata yòn i awor mi ta bieu; ma nunca mi no a mira e hustu desampará, ni su desendentenan ta pidi pan." Salmo 37:25 Ta balapena pone Dios na promé lugá den nos bida.

Si dor di lesa e buki aki e por a kontribuí algu mas, na konosementu pa nos salbashon, duna tur onor i gloria na Dios ku a hasi salbashon posibel pa medio di Hesu-Kristu nos Señor. Amen!